

Oratóriu Fma/Sdb
Timor Leste


Deskobre Lalehan
iha ó-nia laran

Kuarezma 2014

INTRO

Tempu Kuarezma nian mak loron 40 ne'ebé halo sarani sira la'o atu ba hasoru Jezús ne'ebé terus, mate no moris hi'as no halo festa ho Nia. Prepara an iha "liur" la susar: naran hili hatais furak ruma, sui didi'ak fuuk no... ita prontu ona. Maibé, atu prepara ita-nia laran ba enkontru ida ne'e, ita presiza tempu; tan ne'e, iha Ano Liturjiku, Kreda tau tempu Kuarezma. Tempu ida ne'e iha folin boot, tanba tulun ita atu moris tuir Jezús nia atitude sira, no liuhusi orasaun, jejun, karidade, halo ita sai hanesan Jezús, Maromak nia oan loos sira.

Tuir Dom Bosco nia mehi fatuk murak nian, iha virtude rua ne'ebé sei akompaña oratorianu sira iha dalan ida ne'e: Temperánsia no Jejun. Virtude sira ne'e mak importante liu iha tempu Kuarezma, tanba tulun sarani sira atu hasoru babeur sira, luta hodi manán. Tanba Jezús hanorin mai ita katak, liuhusi Kruz, ita bele hatudu Maromak nia domin. Tan ne'e, durante Kuarezma tomak bele prepara kuadru ida ne'e iha ne'ebé domingu-domingu, iha fatin mamuk, sei tau dezeñu ida husi Evanjellu domingu nian. Dezeñu sira ne'e sei haruka liuhusi email, maibé, se iha oratorianu ruma ne'ebé iha talentu atu pinta, bele husu ba nia atu prepara dezeñu ida domingu-domingu.



SEMANA I: DIABU BABEUR JEZÚS.... no ITA!

Atividade

Jezús hatán ba diabu nia babeur ho Maromak nia Liafuan: hamutuk ho oratorianu sira bele prepara surat-tahan ki'ik oan ho fraze ruma Jezús nian no fahe ba ema sira ne'ebé sei tuir Missa, no konvida sira atu moris tuir Jezús nia liafuan sira durante semana tomak (bele mós prepara hamutuk ho oratorianu sira ne'ebé boot no fahe ba labarik sira)



DEZEÑU

Liuhusi dezeńu ne'ebé imi simu, bele reflète kona-ba oratorianu sira nia esperiénsia. Iha ne'e sujere pergunta ruma atu tulun labarik sira hakle'an dezeńu nia mensajen.

- ◇ Oinsá representa diabu no, tuir ó-nia hanoin, tansa representa hanesan ne'e?
- ◇ Buka iha dezeńu babeur tolu ne'ebé diabu apresenta ba Jezús. Babeur sira ne'e oinsá mosu iha ita-nia moris loron-loron nian?
- ◇ Oinsá Jezús manán babeur sira ne'e? Oinsá ita bele manán?

Jogu

AMO PAPA nia MENSAJEN

Amo Papa Francisco hakerek mensajen ida ba Kuarezma 2014, ninia títulu mak: Jezús halo An kiak maski Nia riku, atu husi Nia kiak, imi bele sai riku. Bele prepara liafuan ida ka rua iha surat-tahan A4 no husu ba oratorianu sira atu tau surat-tahan sira ne'e tuir malu hodi hetan Amo Papa nia mensajen. Se hakarak halo komplikadu uitoan, bele subar surat-tahan ida-idak iha fatin keta-ketak no haruka oratorianu sira atu buka.

Istória

Loron ida, kadiuk ida ba apresenta an iha Maromak nia Futar oin. Nia hateten ba Maromak: “Na’i, tuir ha’u-nia hanoin, Ita sala bainhira halo ha’u-nia kulit toos ne’e. Bainhira ha’u komesa sente di’ak iha nia laran, ha’u tenke husi hodi tama iha kulit seluk. Mudansa ida ne’e hakole ha’u!” Maromak hatán: “Maibé ó hatene katak, hodi husik kulit ida ne’e, ó bele sai boot iha kulit seluk”. Kadiuk simu hodi dehan: “Ha’u dehan katak ha’u gosta ha’u-nia kulit ne’e, la presiza troka beibeik!” “Di’ak – hatán Maromak – ó-nia kulit sei la troka tan, sei nafatin nune’e”. Kadiuk haksolok liu atu bele kontinua ho ninia kulit tuan, maibé loron-loron, neineik, nia kulit, duke proteje nia, fó susar ba nia, tanba kadiuk la biban atu dada iis. Nia ba fali hasoru Maromak, maski susar atu ko’alia tanba la bele dada iis, kadiuk hato’o ninia problema: “Ho ha’u-nia re-speitu tomak, maibé karik Ita la komprende: ha’u hakarak kulit ida ne’e hela hanesan nafatin, maibé oras ne’e, kulit sai ki’ik!”. Maromak hamnasa no hatán: “La’ós kulit sai ki’ik, maibé ó mak troka. Loron-loron buat hotu troka, la iha buat ida ne’ebé hela hanesan de’it, no ó iha possibilidade atu husik ó-nia kulit tuan bainhira sai boot”. “Loos duni, ha’u bele troka, maibé buat ne’e hakole ha’u!” “Hotu-hotu, bainhira sai boot, tenke husik buat ruma, maibé buat ne’e fó kbiit foun ba sira. Ó, ema sira, hotu-hotu, sei deskobre buat foun sira bainhira imi husik buat ne’ebé tuan; karik fou-foun bele hetan susar, maibé hafoin imi sei hetan ksolok atu haree imi-nia dezvoltimentu”.





Proposta orasaun nian

Bele lee fali evanjellu domingu ida ne'e nian hodi halo dialogu. Maibé bainhira Jezús hatán ba diabu, husik momentu ruma nonok atu oratorianu sira bele es-presa sira-nia intensaun orasaun nian (ez: lee tiha Jezús nia resposta: 'Ema la moris deit ho aihan,...' bele reza ba sira ne'ebé hamlaha, ka ba sira ne'ebé estuda Maromak nia Futar Lia...).

Hafoin, durante knananuk ida, bele lori dezeńu semana ida ne'e nia no tau iha dezeńu boot kruz nian.



Empeñu

Iha rai fuik maran, Jezús prepara an ba luta kontra diabu; Nia bele hakribit buat ne'ebé diabu propoin ba Nia, tanba Nia iha relasaun espesiál ho Aman Maromak.

Iha semana ne'e nia laran oratorianu ida-idak buka atu komprende saida mak bele hadook nia husi Maromak no haka'as an atu husik.



SEMANA II: JEZÚS NIA OIN NABILAN

Atividade

Iha Primeira Leitura ita sei rona Abrão nia vocasaun, oinsá Maromak bolu nia atu hahú moris foun ida hodi husik buat ne'ebé nia iha no hatene. Iha Evanjellu, Jezús bolu eskolante na'in tolu atu tuir Nia no sa'e foho ida. Jezús bolu ita, iha fatin iha ne'ebé ita hela ba, atu la'o iha Kuarezma ida ne'e, hodi "organiza" ita-nia moris, "kontrola" ita-nia hahalok no husik buat ne'ebé hadook ita husi dalan ida ne'e.

Koko atu prenxe tabela ida ne'e, hodi hakerek buat ne'ebé presiza "kontrola" di'ak liután no buat ne'ebé presiza husik.

	Iha uma laran	Iha eskola/ servisu	Iha oratóriu	Hamutuk ho belun sira
Kontrola				
Husik				

Jogu: EMA LORON nian

Iha Segunda Leitura, S. Paulo kompara hahalok ema kalan nian ho hahalok ema loron nian; iha pasajen seluk nia temi “roman nia oan sira” no “nakukun nia emar sira”. Ita sei halimar nu’udar ema loron nian.

Fahe oratorianu sira ba grupu (grupu ida ema na’in 5); grupu ida-idak iha lilin ida ne’ebé sira tenke lori husi fatin ida ba fatin seluk ne’ebé marka ona. Hili animadór ruma (konforme grupu hira: se grupu 5, maizumenus presiza animadór 5 ka 7) ne’ebé halo “nakukun nia emar sira” no sira kaer kartaun ida ne’ebé sira sei kee atu bele hamate lilin.

Bainhira jogu hahú, sunu tiha lilin, grupu ida-idak tenke la’o hodi lori lilin no haka’as an atu nia la mate. “Nakukun nia emar sira” sei haka’as an, hodi kee sira nia kartaun, atu hamate lilin sira, maibé sira la bele book membru grupu sira. Sira ne’e bele taka lilin ho sira-nia liman, bele hale’u ida ne’ebé lori lilin hodi proteje nia: grupu ida-idak sei haree ninia estratejía atu sira bele to’o fatin ne’ebé marka ho lilin ne’ebé lakan.

DEZEÑU

Liuhusi dezeñu ne’ebé imi simu, bele reflète kona-ba oratorianu sira nia esperiênsia. Iha ne’e sujere pergunta ruma atu tulun labarik sira hagle’an dezeñu nia mensajen.

◇ Jezús ko’alia ho ema na’in rua, sira ne’e se? Tuir imi-nia hanoin, ida ne’ebé mak Moisés?

◇ Eskolante na’in 3 hatudu atitude sira ne’ebé? Imi nota diferênsia ruma husi atitude ema na’in rua nian ne’ebé ko’alia ho Jezús?

◇ Jezús oferese ba eskolante na’in 3 possibilidade atu halo esperiênsia forte orasaun nian? Imi mós halo ona esperiênsia klean ida kona-ba orasaun? Bainhira? Imi aprende saida?

Istória

Belun na’in 4 hakotu atu sa’e hamutuk foho Matebian; sira hanoin atu ba toba Quelicai, hafoin loron tuir mai sedu, sa’e foho. Sira prepara sira-nia moxila hodi hanoin katak sira presiza hela iha liur loron rua: tau faru no kalsa

ruma atu troka se udan tau; sepatu todan uitoan atu uza bainhira dalan sa’e, chapeu, aihan barak tanba la hatene loron hira karik hela iha liur, manta ida se karik toba iha liur no sasán barak tan. Bainhira sira to’o Quelicai, sira hetan primu ida ne’ebé simu sira toba iha ninia uma no dadersan hahú la’o. Sira nia moxila boot no todan, nune’e, bainhira loro hahú manas, sira hotu komesa kosar. Bainhira sira sa’e uitoan, sira hasoru labarik ida ne’ebé tau matan ba bibi sira. Nia husu: “Imi ba ne’ebé?” “Ami ba foho tutun”. Labarik hateke ba sira-nia moxila hodi dehan: “Ho buat todan ne’e?? Se imi hakarak ha’u bele la’o hamutuk”. Sira la hatán ba labarik nia provokasaun, maibé sira deside atu la’o hamutuk ho nia, tanba nia hatene fatin. Labarik la’o kmaan tanba lori de’it bee uitoan no ai-tonka ida, maibé sira na’in 4, ho sira-nia moxila todan, arraska liu! Teki-teki, udan tau maka’as, rai-lakan tarutu, labarik hakilar atu tuir nia tanba hatene fatin ida iha ne’ebé sira bele hetan di’ak no nia hahú hala’i; sira na’in 4 koko atu tuir nia, maibé tanba sasán bokon sai todan liu, sira la biban atu tuir nia. Sira hahú hakilar no sira rona labarik nia lian husi dook hakilar: “Imi so’e imi-nia sasán todan ne’e no halai tuir dalan iha sorin loos”. Sira na’in 4 ta’uk liu, la hanoin tan sira husi iha rai sira-nia moxila no hala’i tuir dalan ne’e to’o uma ki’ik oan ida, iha ne’ebé sira bele hein to’o bainhira udan para no soi sira-nia an husi rai-lakan.

Dala barak, iha ita-nia moris ita fô atensaun ba buat ne’ebé ladún iha valór no halo buat hotu ne’ebé ita hakarak, to’o bainhira, iha situasaun apertada, ita deskobre katak buat uitoan de’it mak importante atu ita bele moris!





Proposta orasaun nian

Bele lee fali evanjellu domingu ida ne'e nian. Tuir mai bele reza salmu 42 iha ne'ebé espresa deseju atu haree Maromak nia Futar Oin.

Hafoin, durante knananuk ida, bele lori dezeñu semana ida ne'e nia no tau iha dezeñu boot kruz nian



Empeñu

Pedro, Tiago no João seidauk prontu atu kontempla Jezús iha ninia Glória... iha momentu ne'ebé Jezús halo esperiênsia kle'an orasaun nian hamutuk ho

Elias no Moisés, sira ta'uk. Dom Bosco dehan: "Ahi mate se imi la tau ai", ba orasaun "manas" ida presiza hili tempu no sai fiel ba empeñu ida ne'e. Buka tempu no fatin ida iha ne'ebé, liron-loron, bele reza hakmatek no lee Maromak nia Futar Lia hodi rona Na'i nia hakaran.



SEMANA III: FÓ BEE MAI HA'U

Atividade

Bee mak importante ba ita-nia moris: ema ne'ebé la hemu sei mate lalais. Keta karik iha ita-nia bairu ba knua sira iha katuas no ferik ruma, eh família ruma ne'ebé susar atu asesu ba bee... oinsá ita bele tulun sira? Bele ba kuur bee ba sira ka lori bee atu hemu... maibé hamutuk bele hanoin ba sira-nia klamar no lori "bee ba moris spiritual", katak imi bele reza hamutuk ka lee Maromak nia Futar Lia hodi hato'o reflesaun ruma.

Jogu: KANABAN LA IHA

Jogu ida ne'e foti inspirasaun husi feto Samaria nia liafuan ba Jezús bainhira Nía promete bee ba feto : "Na'i, Ita kanaban la iha".

Fahe oratorianu sira ba grupu, bele to'o na'in 7/10, grupu ida-idak iha balde rua: ida mamuk, ida nakonu ho bee. Tau balde rua ne'e dook malu no iha klaran tau obstakulu ruma (kadeira ida atu haksoit, fatuk sira ne'ebé marka zig-zag...). Hanesan Jezús, jogadór sira la iha kanaban atu lori bee husi balde ida ba balde seluk, nune'e bele uza liman de'it. Jogadór hotu sei halai tuir malu dala ida, hafoin animadór sira sei sukat bee ne'ebé grupu ida-idak biban atu lori to'o balde mamuk.

DEZEÑU

Liuhusi dezeńu ne'ebé imi simu, bele refleto kona-ba oratorianu sira nia esperiéncia. Iha ne'e sujere pergunta ruma atu tulun labarik sira hake'an dezeńu nia mensajen.

◇Imi gosta oinsá pinta enkontru entre Jezús no fetu Samaria nian? Tansá?

◇Se mak ema sira seluk ne'ebé haree iha dezeńu? Tuir sira-nia oin, sira sei hanoin saida?

◇Saida mak troka iha fetu Samaria depois de hasoru Jezús? Tanba imi hasoru beibeik Jezús iha Sakramentu sira, saida mak troka iha imi-nia moris?



Empeñu

Liuhusi enkontru entre Feto Samaria no Jezús, maksoin tama iha sidade ida ne'ebá. Mai-bé se Jezús ka fetu ida ne'e tuir prekompreñaun ne'ebé iha (la bele ko'alia ho fetu sira, la bele hakbesik estranjeiru sira, la bele fiar ba fetu aat ida...) sira hotu la hetan salvasaun. Iha semana ida ne'e bele "jejun" husi ita-nia prejuizu, prekompreñaun no ko'alia aat kona-ba ema, ne'ebé impede mai ita atu hakbesik ema seluk ho liberdade no lialoos.

Istória

Foin-sa'e ida hakbesik amlulik ida no dehan ba nia: "Ha'u buka Maromak". Amlulik ida ne'e, ho ksolok, hato'o ba nia omelia ne'ebé foin halo durante Missa. Hotu ona, foin-sa'e husik amlulik nia uma ho neon-kraik no ba hasoru Amo Bispo. "Amo, ha'u buka Maromak"; Amo Bispo foti surat-tahan ida no hahú lee ninia surat pastorál. Leitura hotu ona, foin-sa'e husik Amo nia uma no sei triste liu tan. Nia ba hasoru Amo Papa: "Ha'u buka Maromak!", no Amo Papa hahú hatán ho ninia ensiklika, bainhira, teki-teki, foin-sa'e ida ne'e tanis. Amo Papa hakfodak: "Bainó, tansa ó tanis?" Foin-sa'e hatán: "Ha'u buka Maromak no ema oferese mai ha'u liafuan sira!"

Kalan ida ne'ebá amlulik, Amo Bispo no Amo Papa mehi hanesan: sira mehi katak sira hamrook atu mate no sira hetan ema ida ne'ebé, duke fó bee ba sira, ko'alia ba sira kona-ba bee nia importáncia!



Proposta orasaun nian

Bele lee fali evanjellu domingu ida ne'e nian. Bainhira lee Jezús nia liafuan: "Fó bee mai Ha'u" bele para no fó tempu ba interseñaun livre: ita reza ba ema hotu ne'ebé "hamrook" kona-ba justisa, damen, domin... (bele husik oratorianu ida-idak hasa'e ninia orasaun ka bele prepara intensaun sira ne'e).

Tuir mai kontinua ho Evanjellu, bainhira lee "Na'i, fó be ida ne'e mai ha'u, atu ha'u keta hamrook, nune'e ha'u lalika mai tan kuru be iha ne'e." bele husu perdu ba Na'i, tanba ita baruk atu halo buat ruma ba ema seluk nia presiza (iha uma laran no sosiedade). Bele hananu "Na'i sadia ami"

Hafoin, kontinua lee to'o versikulu 26. Ikus nian, durante knananuk ida, bele lori dezeńu semana ida ne'e nia no tau iha dezeńu boot kruz nian.



SEMANA IV: HAREE HO JEZÚS NIA MATAN


Atividade

Bainhira ema haree ladún mós, nia ba okulista (dotor matan) atu konsulta. Ita bele halo check-up ba ita-nia matan, maibé mós ba kolega sira ka ema sira iha parokia.

- 👁 Ó-nia matan gosta hateke ba saida? Tv/internet; natureza/animál sira; ema-nia hatais/ema nia korente, kadeli nst...
- 👁 Bainhira ó hateke ba ema ida, ó haree ninia defeitu sira de'it ka hatene haree ninia di'ak (atu hatene loloos, hili ema na'in 3 no hakerek ninia defeitu 1 no ninia aspetu pozitivu 3)
- 👁 Ó hatene haree ema nia presiza ka ó haree de'it ó-nia an rasik no ninia nesesidade sira?
- 👁 Ó sente oinsá bainhira ema hateke ba ó hodi julga ó-nia hahalok sira?
- 👁 Ikus liu, taka ó-nia matan no hanoin ba ema sira ne'ebé ó la gosta: oinsá Jezús hateke ba sira? Koko atu uza Jezús nia matan no haree diferénsia!

Jogu:

Hanesan ita rona iha Jezús nia esperiénsia ho matan-delek, iha ema ruma ne'ebé ta'uk atu ko'alia loos bainhira ema kritika sira ka hamta'uk sira. Ba jogu ida ne'e, ani-madór na'in 2 sei hamriik iha oratorianu sira nia oin: ida sei hatais mutin (ida ne'ebé ko'alia loos) ida fali sei hatais metan (ida ne'ebé bosok)



Sira na'in rua sei haruka oratorianu sira atu halo buat ruma: hamriik, haksoit, hakuak malu... Oratorianu sira tenke halo tuir buat ne'ebé hatais mutin dehan no halo "kontrariu" ho ida fali. Importante katak sira la ko'alia tuir malu (dala ida mutin, dala ida metan), maibé karik ida ne'ebé mutin fó orden 2 ka 3 hafoin ida ne'ebé metan fó ninian... nune'e susar liu ba oratorianu sira atu hatene halo oinsá.

Istória

Grupu ida parlamentar sira nian, partisipa ba Kongresu ida ne'ebé atrasa iha momentu konklusaun nian. Sira hotu halai atu bele sa'e avion. Besik odamatan aeroportu nian iha mejina ida ho frutas: sira hotu halai, nune'e ida kona mejina ida ne'e ho ninia pasta no halo monu buat hotu ne'ebé iha meja leten. Kolega sira hakilar ba malu: "Husik bá, ita ba lalais!" Maibé sira ida sente ladún di'ak, no hatán ba kolega sira katak la lika preokupa ba nia, nia sei tuir. Hafoin nia fila fali ba liur no nia hakfodak hodi haree katak besik mejina iha labarik feto ida ne'ebé tanis no ema hotu liu lalais, la liga nia. Mane ida ne'e hakbesik mejina no dehan ba labarik: "Keta tanis, ha'u sei tulun ó atu hili fali ó-nia frutas". Teki-teki, nia komprende katak labarik ida ne'e mak matan-delek no nia tanis tanba nia la haree frutas iha ne'ebé.

DEZEÑU

Liuhusi dezeńu ne'ebé imi simu, bele reflète kona-ba oratorianu sira nia esperiénsia. Iha ne'e sujere pergunta ruma atu tulun labarik sira hakle'an dezeńu nia mensajen.

◇Haree dezeńu no esplika: Jezús halo saida? No ema matan-delek? Iha personajen tan iha dezeńu laran?

◇Jezús halo milagre ida ne'e sa loron? Tansá Fariseu sira mura-mura?

◇Saida mak troka iha ema ida ne'e? Se ha'u bele hili, ha'u hakarak sai hanesan se?

Katuas ida ne'e hakru'uk no hahú hili frutas sira: balun sei di'ak no nia tau fali iha meja leten, balun aat ona, no nia tau ketak. Bainhira la iha ona buat ida iha rai, katuas dehan ba labarik: "Hotu ona, favor ida, simu 100 US\$ ne'e, ba dezastre ne'ebé ha'u no ha'u-nia kolega sira halo no tanba frutas barak la bele fa'an ona. Ó di'ak". Labarik feto hamnasa midar no katuas kontinua: "Ha'u hein katak ó-nia loron ida ne'e bele kontinua di'ak liu" no hafoin foti ninia pasta atu ba sa'e avion. Labarik feto hakilar ba nia: "Senhor...", katuas para no hateke fali ba nia. Labarik kontinua: "Ita mak Jezús?" Katuas hateke fali ba labarik, hafoin, nonok, tama iha aeroportu hodi lori pergunta ne'e iha ninia laran: "Ita mak Jezús?"

Furak tebes se ita-nia hahalok bele halo ema hanoin katak Jezús hakbesik sira. Iha sosiedade ne'ebé, dala ruma, matan-delek atu haree Maromak nia prezensa, ita bele tulun maluk sira atu haree Jezús!



Proposta orasaun nian

Bele lee fali evanjellu domingu ida ne'e nian tuir forma badak ne'ebé liturjia propoin.

Durante orasaun bele hili momentu ida atu husu perdaun ba momentu sira ne'ebé ita "la haree" ema seluk nia presi-za: oratorianu ne'ebé hakarak bele espresa ninia orasaun no sira seluk hatán ho "Na'in sadi'a ami" (bele reza ka hananu).

Hafoin oratorianu ida-idak bele ba hamriik iha kruz oin (ka dezeńu ho kruz ne'ebé ita monta durante Kuarezma) no dehan, hanesan ema matan-delek, "Na'i, ha'u fiar".

Durante knananuk ida, bele lori dezeńu semana ida ne'e nia no tau iha dezeńu boot kruz nian



Empeñu

Iha semana ida ne'e ita hakarak haree buat hotu (ha'u-nia an rasik, ema sira, akontesi-mentu sira...) ho Jezús nia matan, ne'e katak ha'u sei hateke ba ema hotu ho respeitu, atensaun, domin.



SEMANA V: HARAİK MORIS

Atividade

Jezús halo Lazarus moris fali: iha ita-nia moris loron-loron nian, ita bele hasoru ema barak ne'ebé moris hanesan “matebian” sira. Ita bele halo saida atu fó esperansa moris nian ba sira: karik ba vizita ema moras, ka ema ne'ebé hela mesak, tulun família ida ne'ebé iha susar laran.... hanesan Jezús, imi-nia kriadividade bele kontinua Jezús nia hahalok.

Jogu: BUKA LAFAEK

Materiál: surat-tahan barak naruk (hanesan ikun) no daun atu prega iha lafaek nia kotuk.



Animadór ida hatais verde no sai lafaek, iha ninia kotuk prega surat-tahan sira.

Iha ne'ebé oratorianu sei halimar, presiza marka fatin 3 iha ne'ebé lafaek bele halai ba hodi deskansa no jogadór seluk la bele book nia.

Bainhira jogu hahú, jogadór sira tenke hala'i atu foti surat-tahan husi lafaek nia kotuk, hodi la halo nia book sira. Se lafaek book sira, sira mate no sai husi jogu.

Jogu hotu ona bainhira lafaek oho jogadór hotu (entaun nia manán), ka bainhira jogadór sira biban atu hasai surat-tahan hotu husi lafaek nia kotuk (entaun sira mak manán)

Istória

Iha ninia moris, Dom Bosco halo labarik ruma moris fali, hanesan Jezús. Maibé eduka mós ninia foin-sa'e sira atu luta hasoru mate, no, momentu ne'ebé iha Turin mosu moras kolera, Dom Bosco envolve foin-sa'e sira atu ba tau matan ba moras sira.



Iha fulan maiu, Dom Bosco fó hatene ba foin-sa'e sira katak Kolera sei to'o Turin hodi provoka mate barak, maibé nia dehan: “Imi keta ta'uk, se imi sei halo buat ne'ebé ha'u dehan ba imi, imi sei soi an husi moras ida ne'e.” Foin-sa'e hotu husu: “Ami tenke halo saida?”.

DEZEÑU

Liuhusi dezeńu ne'ebé imi simu, bele reflete kona-ba oratorianu sira nia esperiénsia. Iha ne'e sujere pergunta ruma atu tulun labarik sira hagle'an dezeńu nia mensajen.

◇ Iha dezeńu ida ne'e imi haree se? Personajen ida-idak halo saida?

◇ Haree didi'ak Jezús: hodi pinta ho espresaun ida ne'e, pintór hakarak espresa saida?

◇ Milagre ne'ebé Jezús halo mak boot: ema hotu simu ida ne'e? Tansa balun simu, balun lae?

◇ Iha ha'u-nia moris ha'u hatene haree milagre sira ne'ebé Maromak halo?

Dom Bosco hatán: "Uluk nana'in imi presiza moris iha Maromak nia grasa, hafoin tara ba kakorok Maria Santissima nia medalla ne'ebé ha'u sei bensa no fó ba imi. Loron-loron imi sei reza Ami Aman ida, Ave Maria ida no Glória ida hodi harohan ba S. Luis no dehan "Na'i hasai ami husi buat aat".

Iha momentu ida ne'ebá administradór prepara fatin ruma nu'udar ospital, atu bele halibur moras sira, maibé nia la hetan ema ruma ne'ebé barani atu lori ema moras sira husi sira-nia uma to'o fatin sira ne'e. Dom Bosco halibur foin-sa'e sira no haktuir ba sira buat ne'ebé nia haree hodi ba vizita ema moras sira; nia fó hanoín ba foin-sa'e sira katak Jezús hateten katak ida ne'ebé tau matan ba ema moras ida, nia sei tau matan ba Nia rasik... nune'e Dom Bosco konvida foin-sa'e sira atu oferese an ba atividade ida ne'e. Na'in 14 hatán kedas hodi ba apresenta an ba Komisaun Saúde nian, liu tiha loron ruma, na'in 30 tan halo hanesan. Molok sira hahú sira-nia serbisu, Dom Bosco hato'o ba sira informasaun ruma atu moras ne'e la bele hada'et ba sira, hafoin haruka sira ba. Bainhira ema rona katak Dom Bosco nia oan sira oferese an atu bali ema moras sira, ema barak hakbesik Dom Bosco hodi husu tulun ba familia sira, parenti, belun sira ne'ebé presiza. Loron no kalan, sira servisu nafatin! No mós, bainhira ema moras sira la iha lensól ka hatais, foin-sa'e sira hato'o sira-nia problema ba mama Margareta, ne'eb'e ba foti buat hotu ne'ebé iha uma laran hodi fó ba sira.

Iha loron ruma nia laran, sira la iha ona buat ida, se lae buat ne'ebé sira hatais no manta ida atu falun an bainhira toba... sira la iha ona buat ida, maibé sira iha sira nia moris, tanba sira ida la mate... no moris nakonu ho ksolok!



Proposta orasaun nian

Bele lee fali evanjellu domingu ida ne'e nian tuir forma badak ne'ebé liturjia propoin.

Hafoin bele reza salmu 129/130 (salmu responsoriál domingu ida ne'e nian) ka salmu 102/103 (bele hetan iha Missa vijilia Pentekoste nian); hili refraun ida ne'ebé bele hananu entre kuadra ida-idak.

Durante knananuk ida, bele lori dezeñu semana ida ne'e nia no tau iha dezeñu boot kruz nian.



Empeñu

Iha semana ida ne'e ita sei haka'as an atu hala'o ita-nia atividade sira hanesan ema ne'ebé simu moris foun loron-loron. Temperánsia sei tulun ita atu hala'o buat hotu ho ekilibriu no hodi hateke de'it ba Jezús.



SEMANA VI: DOMINGU dos RAMOS

Durante semana ida ne'e, ita hotu iha serbisu barak atu hala'o: acolito sira prepara selebrasaun, koru sira treinu atu hananu didi'ak, sira ne'ebé prepara dekorasaun durante Semana Santa loron-loron iha serbisu ruma.

Oinsá ita bele tulun atu selebra didi'ak Solenidade Paskua nian?

DEZEÑU

Liuhusi dezeñu ne'ebé imi simu, bele refleto kona-ba oratorianu sira nia esperiénsia. Iha ne'e sujere pergunta ruma atu tulun labarik sira hakle'an dezeñu nia mensajen.

◇Ema sira ne'ebé tuir akontesimentu ida ne'e, esprime sa loos ho sira nia hahalok (koko atu esplika sira-nia sentimentu

PASKUA

